



1. Radunanza cumünela dals 2.04.2014 a las 20.00 in sela polivalenta S-chanf

Presidi: Duri Campell

Actuar: Duri Schwenninger

Preschaints: Preschaints sun 31 votantas e votants

Scrutinaduors: Scu scrutinaduors vegnan elets Nadia Pavanello e Daniel Sutter

Tractandas:

1. Protocol da la radunanza dals 11.12.2013
2. Tscherna cumischiun per trattativas cun proprietaris privats in connex cun l'inzonaziun ingrandimaint deponia Bos-chetta Plauna
3. Salzgeber Joos Simon, dumanda per differents drets da passagi per lingias s-chudamaint a distanza / der cumpetenzza al cussagl cumünel per conceder zievamaun drets da passagi tenor dumandas da fabrica entredas
4. Schlargiamaint dals indrizs per l'alluntanamaint da l'ova persa e pel provedimaint da l'ova potabla Chauntaluf/Foura Chagnöls, etappa 3/2014, credit fr. 1'800'000.00
5. Cumischiun da gestiun, acceptaziun quadern da dovairs
6. Departamaint chantunel da construcziun, trafic e silvicultura, cunvegna amicabla regard la correctura da la via Engiadina, Cinuos-chel fin Brail Vest
7. Varia

La glista da tractandas vain approveda sainza objecziuns.

Protocol: Il protocol da la radunanza cumünela dals 11 december 2013 vain approvo.

1 0.122 Cumischiuns
Tscherna cumischiun per trattativas cun proprietaris privats in connex cun l'inzonaziun ingrandimaint deponia Bos-chetta Plauna

Il president spiega, cha causa ch'el es involvo scu proprietari da terrain, preschainta il vice-president quista tractanda. Il vice-president spiega, cha la revaisa parziela da la planisaziun deponia regiunela Bos-chetta Plauna es gnida inoltreda a l'uffizi per il svilup dal territori Grischun per üna examinaziun preliminar. Uossa es avauntmaun il rapport d'examinaziun cun üna pusiziun, cun pocas excepziuns, sten positiva. Cun que saja raggiunt il temp da preparar la procedura da cooperaziun e parallel da cumanzer las trattativas culs proprietaris privats da terrain. Que sun Duri Campell e la Confederaziun, rapreschanteda tres l'Armasuisse. Perque s'ho decis da tscherner üna cumischiun cun 5

commembers chi suottametta a la radunanza a temp ütil ils resultats da las trattativas. Inavaunt spiega il vice-president, ch'eir el saja involvo scu fittadin dal pro agricul e ch'el nu's metta a disposiziun per la cumischiun. Our dal ravuogl vain fatta la proposta da tscherner 3, impè da 5 commembers, siand chi nu sun avautmaun avuonda personas chi's mettan a disposiziun per la cumischiun. La radunanza decida cun granda magiurited e sainza cuntravusch da tscherner ad Jnes Barblan, Ramon Angelini ed a Martin Rocca.

2 0.210 Contrats e cunvegnas
Salzgeber Joos Simon, dumanda per differents drets da passagi per lingias s-chudamaint a distanza / der cumpetenza al cussagl cumünel per conceder zievamaun drets da passagi tenor dumandas da fabrica entredas

Il president spiega, cha Joos Simon Salzgeber ho inoltro la dumanda per drets da passagi per las lingias da s-chudamaint sün differentas parcellas. Cun quista dumanda generela dess gnir impediue, chi's stu suottametter in avegnir per mincha etappa üna dumanda a la radunanza. Que as tratta da las seguintas parcellas: nr. 292, 293, 274, 273, 282, 571, 656, 571, 159, 652, 242, 314, 315, 149, 130, 132, 265, 206, 89, 110, 85, 16., 104, 13, 198, 779, 3, 688, 816, 13, 648, 209, 173, 174. Inavaunt preschainta il president il plan correspondent, inua chi sun visibels cun differentas culuors ils drets da passagi concess, ma eir ils novs na auncha trattos. Zieva cuorta discussiun decida la radunanza cun granda magiurited e sainza cuntravuschs da der la cumpenza al cussagl da decider e suottascriber ils contrats da servitut a maun chi aintran las dumandas da fabrica.

3 7.100 Chanalisaziun/sarinera
Schlargiamaint dals indrizzs per l'alluntanamaint da l'ova persa e pel provedimaint da l'ova potabla Chauntaluf/Foura Chagnöls, etappa 3/2014, credit fr. 1'800'000.00

Il depüto spiega, cha da l'an 2012 s'ho cumanzo cun las lavuors da la prüm'etappa in connex cul schlargiamaint dals indrizzs per l'alluntanamaint da l'ova persa e pel provedimaint da l'ova potabla in Chauntaluf/Foura Chagnöls. L'an passo es gnida piglieda per mauns la seguond'etappa e quist an es previs da fer auncha la terza ed ultima etappa in Foura Chagnöls. Planiso es da cumanzer cun las lavuors zieva Pasqua. Ils cuosts d'investiziun per l'etappa 3/2014 sun previs i'l preventiv 2014 cun ün import dad 1 milliun francs. L'import da credit definitiv es gnieu eruieu da las offertas chi sun entredas ed es bainschi pü ot scu planiso oriund. Il depüto preschainta il plan da lavur per l'etappa da quist an. Our dal ravuogl vain fat attent, chi saja da coordiner las lavuors da fabrica culs paur, cha l'access per purter il fain stu esser garantieu. Impü vain fatta la dumanda, scha la vschinauncha surpiglia il cuosts pels attachs dadour la zona da fabrica, respectivmaing per ir cun las lingias suot il binari dal tren. Il mneder da fabrica spiega, cha'l cussagl ho auncha da decider in chosa. Ün votant renda attent a la festa dal president dal Grand cussagl chi varo lö ils 30.08.2014 a S-chanf e cha la lavur dess esser glivreda i'l minz. Zieva animeda discussiun deliberescha la radunanza cun granda magiurited e sainza cuntravuschs il credit da fr. 1'800'000.00.

4 0.125 Cumischiun da gestiun
Acceptaziun quadern da dovairs

Il president da la cumischiun da gestiun spiega, cha da l'an 2008 ho la prüma cumischiun da gestiun, zieva la revaisa dals tschantamaints da l'an 2007, elavuro ün quadern da dovairs chi'd es gnieu suottamiss quella vouta al cussagl cumünel. Siand cha la cumischiun da gestiun vain tschernida da la radunanza, es quella cumpetenta per appruver il quadern da dovairs. Quist an ho la cumischiun auncha fat tscherts adattamaints tenor experienzas e resguardand las ledschas superiuras. Il president spiega, cha la consequenza da quista acceptaziun es, cha'ls tschantamaints haun da gnir adattos cun üna nouv'alinea chi descriva, cha detagls da las incumbenzas sun descrits i'l quadern da dovairs. La radunanza fo üna lecziun dal quadern da dovairs ed accepta quel

cun granda magiurited e sainza cuntravuschs. La nouv'alineia i'ls tschantamaints dess gnir agiunta cun fer la revaisa totela dals tschantamaints.

5 0.210 Contrats e cunvegna
Departamaint chantunel da construcziun, trafic e silvicultura,
cunvegna amicabla regard la correctura da la via Engiadina,
Cinuos-chel fin Brail Vest

Il president spiega, cha quist an piglia l'uffizi chantunel per mauns las lavuors per la correctura da la via Engiadina traunter Cinuos-chel e Brail. Scu prüm es planiso d'eriger üna nouva punt tar la val Punt Ota. Impü es previs in püssas etappas, spartieu sü sün püs ans, da schlarger ed amegldrer il traget da la via fin Brail. Our da quels motivs ho il departamaint chantunel da construcziun, trafic e silvicultura inoltro üna cunvegna amicabla pel terrain cumünel chi vain trat a nüz temporari per installer il plazzel da fabrica, però eir pel terrain cumünel chi vain sblutto cun eriger la nouva punt e la correctura dal traget. Il chantun ho previs da cumazer quista prümavaira cun las lavuors. Ad es previs d'utiliser transitoricamaing terrain da las parcelas nr. 489 (ca. 249 m²) e 497 (ca. 917 m²), per installer il plazzel da fabrica. L'adöver transitoric vain indemniso cun fr. 0.40 per m². Impü dumanda il chantun da cumprer terrain da las parcelas nr. 489 arduond 249 m² per fr. 2.50/m², nr. 497 arduond 416 m² per fr. 2.50/m² e nr. 427 arduond 6 m² per fr. 5.00/m². Zieva cuorta discussiun decida la radunanza cun granda magiurited e sainza cuntravusch d'accepter la cunvegna amicabla cul chantun.

6 9.999 Varia

Il president orienscha a la radunanza, cha'l fnestrigl da l'administraziun cumünela es daspö ils 02.04.2014 in funcziun sül büro nouv, ex-posta. Cha tuot ils büros cumünels sun uossa accessibels per impediens e glieud attempeda.

Inavaunt orientescha'l, cha la prosma radunanza cumünela ho lö ils 30 avrigl 2014. Lo ho lö sün giavüsch dal cussagl da scoula, la tscherna complementera pel president dal cussagl da scoula scu eir per ün commember dal cussagl da scoula. Impü vain oriento, scu üsito aunz üna procedura da cooperaziun, sur da la revaisa parziela da planisaziun deponia Bos-chetta Plauna.

Our dal ravuogl vegnan fats cumplimaints als involvos regard la rumida da naiv, saja que als collavuratuors cumünels scu eir als incumbenzos.

Impü vain giavüscho da mner tres controllas da sveltezza e d'installer ün sistem chi imsüra la sveltezza e muossa quella in Somsomvih.

Ün votant renda attent, cha davent da la Punt da Fuorn fin tal zardin chantunel füss da ponderer da spuster la loipa sün tuot il traget da la vart schnestra da la via, siand cha la loipa traversa adüna darcho la via.

Our dal ravuogl vain il giavüsch da tscherner illa prosma radunanza üna cumischiun per fer la revaisa dals tschantamaints.

Il president serra la radunanza a las 22.10 ed ingrazcha a tuot ils preschaints per lur cumparsa.

In buna fè

Il president:

L'actuar:

D. Campell

D. Schwenninger